

欽定大清會典事例

欽定大清會典事例卷一百九十九

戶部

漕運

截留事例

漕糧徵收

截留事例○康熙三十三年題准截留武清水  
平等處漕米每石收耗米一斗八升三合九勺  
四抄○又題准直隸省永平等處截留漕糧每  
石耗米皆以一斗八升三合九勺四抄作正兌  
收○三十八年題准江西湖廣兩省漕糧截留  
江南山東等處每石耗米均以二斗五升作正  
交兌○三十九年定截留平糶所賣錢文係漕

項錢糧。或易銀交部。或搭放兵餉。將原給款項  
扣解。以抵留漕價值。○四十一年題准。江南山  
東。截留漕米。出入交收。每石加耗米三升。○五  
十八年題准。江西湖廣兩省漕糧。截留江南安  
慶等處。將加四耗米。全數作正交兌。○六十年  
題准。江西省糧米。截留直隸大名等處。照三十  
八年之例。每石以二斗五升。作正交兌。應交席  
木板片。行文扣追。並停給簞羹紅剝等銀。○雍  
正三年題准。截留漕糧。仍照舊例。正兌以加二  
五。改兌以加一七耗米。作正交收。○又題准。江

西省糧米。截留直隸保定等處。每紅斛米一石。給耗米一斗。其平斛米。每石原有耗米二斗五升。均令運通交倉。所有水腳。計運程遠近給發。○六年題准。江西省截留漕米十萬石。存儲本省備用。出入盤量。照江南旋收旋糶之例。每年加耗三升。於截漕贈軍耗米內扣抵。其糶過米價銀。存儲司庫。俟秋收。照數買補還倉。○七年咨准。直隸省天津水師營。截留漕米。照薊滄之例。每正兌正米一石。外加耗米七升。尖米四升二合。尖耗米二合九勺四抄。又新耗米六升九

合改兌正米一石。外加耗米四升。尖米四升二合。尖耗米一合六勺八抄。又新耗米四升四合。折正兌交。○九年題准。截留天津北倉漕米四十萬石。從前截收之時。未有正兌耗米及曬颺入倉。嗣後照天津水師營截留漕米之例。每月每石遞減米二合。二年統計共減耗米九千六百石。○又題准。天津截留漕糧。每百石給地方官耗米一升。以作折耗。○又題准。湖廣江西兩省截留山東漕米。除耗米二五。一七。作正截留外。將所餘盤耗米。按程計算折耗。給還運軍。其

餘作正截留。○又議准截留直隸山東河南三省豫備賑濟漕米。隨到隨收。不得稽遲時日。致誤回空。其一應水陸運價。及苫蓋露囤等費。均動用公項錢糧。○又定截留漕米。落涯進倉等費。概令旗丁自備。○十二年題准。截留山東省漕糧。每石除原給加耗一升外。每月每石仍遞減米二合。至一年後再有虧折。令各官照數賠補。○乾隆元年題准。各省截留漕船。介於起運停運之間。行糧月糧。應給應追。向未定有成例。嗣後江蘇安徽浙江。截留漕船。應支本折月糧。

三修銀。准其照數全給。至行糧盤耗。贈銀負重等項。各隨多寡。分作十分。自水次抵通。按程途遠近。亦作十分計算。行一分程途。給一分銀糧。如行一兩站。未及一分者。即按一兩站扣算。支給贈米一項。如米到州縣。半月放清者。按已行之程扣給。其未行之程。追繳。半月以外。每石給米一升。滿一月者。給米二升。滿二月者。給米四升。滿三月者。全給。若幫船截留。本次。或旋兌。旋即。或數月後收清。贈米亦按月計算。江西漕船較大。裝米數多。每年額領三修銀不敷。取辦於

行月兼之水次開行。逐節淺阻起剝。長江守風。過淮修船。一應費用。較江浙不同。遇有截留。將原領折耗。行月贈銀。贈米。斛面米。均免扣追。又每米一石。徵耗米四斗。為交通倉及沿途折耗之費。副耗米一斗三升。為水次開行抵淮折耗。如在淮安以南截留者。將四耗米。令其隨正交納。一三副米。免其追繳。如過淮截留者。將四耗米內。正兌米。隨交二斗五升。改兌米。隨交一斗七升。並每石別交一升。贈米外。其餘米。按由淮到通程途。作為十分計算。行一分程途。即給一

分耗米。湖北湖南漕船。灣泊岳州府。濱臨洞庭。風波不測。截留漕船。於例給一半月糧之外。每船酌留頭舵水手四名防護。每名自給口糧一升。減去水手人等。每名每站給盤費銀三分。米一升。均照時價折給。○二年

諭。各省截留漕船。例有應追銀米。但念運軍近年以來。尚屬急公效力。其從前挂欠之項。事隔數年。此時責令完補。未免艱難。著漕運總督詳細覈明。將雍正十二年以前。各省截留漕船。應追行糧漕贈盤耗等項。除已完外。其未完者。一概寬免。○又奏准。山東省截

留漕船應支三修月糧。及任城幫貼運銀仍照舊支給。其本折行糧及潤耗銀各按多寡。准作十分水次抵通程途。亦作十分計算。行一分程途。准銷一分銀米。如行未及一分者。按程扣算。支給潤耗米五升。即如江南之五米。嗣後米到截留州縣。半月內收清者。按已行之程扣給。其未行之程。追繳。如過半月。給米一升。滿一月者。給米二升。滿二月者。給米四升。滿三月者。全給。其截留在本次者。雖船未開行。而糧已裝載。與中途截留者。折耗相同。潤耗米亦按月支給。河

南漕船。皆係別省協運。除不議三修外。僅遇漕留之年。月糧一項。全數支給。如船雖抵次。尚未裝載者。河南亦毋庸議給。至潤耗。行糧銀米。各隨多寡。計作十分。其程途亦作十分計算。行一分程途。給一分銀米。如行一兩站。未及一分者。即按站支給。官役俸工。亦照額支給。如本船開行已及十數站。奉文截留。仍回原次交卸者。往返程途。皆照重運程途計算。將所領前項銀米。按程扣給。其不足十分程途之數。按程計追。潤耗米一項。亦照東省例支給。至盤剝銀。截留船

糧已抵臨清者。全數支給。如未抵臨清。將所領盤剝銀。作為十分。自衛輝水次至臨清。亦作十分程途。扣算計給。○又咨准。湖北省撥賑漕米。應需撥運水腳銀兩。在餘贖漕費銀內。動支給發。○三年定。直隸省北倉截留備賑漕米。照京通各倉之例。將豫備篩颺米石。一體交倉。○又議准。嗣後截留北倉之漕米。每百石。免交耗米一石。以恤軍丁。○四年題准。湖北。湖南。兩省運軍所領錢糧。比別省較少。截留漕船。所領三修行月二耗。並州縣津貼京腳銀米。均免扣追。惟

所領四斗耗米。視其船未出境。在本省截留者。均令隨正交收。若已出境者。內一五耗米。按已行未行程途。分別追給。○五年題准。各省截留漕船。有到次尚未受兌。及已兌未開行者。嗣後未兌之船。照停運例。給予減半月糧。已兌未開之船。於減半月糧之外。將三修一項。照數全給。各省畫一辦理。○又奏准。截留船糧。應給贖羨銀兩。一概停止。○六年題准。各省漕船。截留北倉暨滄州者。應將領過行糧。漕贈盤耗銀米。一例按照程途。分別扣追。惟運薊軍船。由天津海

口入薊。綿長九百餘里。又運易軍船。自天津抵  
次。水程三百餘里。領過銀米。一概免追。再各省  
凡遇截留。如已兌開行之船。所領一半月糧。同  
行糧等項。應勻作十分計算。一律按程扣追。  
七年題准。各省截留漕船。已兌開行。按照定例  
扣追。運軍多有苦累。嗣後酌量加給。分別程途  
遠近。船糧多寡。山東河南。每船給銀五十兩。江  
南浙江。每船給銀六十兩。江西湖廣。程途均遠  
於江浙。江西裝載正糧。每船又較湖廣多至二  
三百石。湖廣。每船給銀七十兩。江西。每船給銀

九十兩。以敷各軍在次修船置備什物及雇募船頭水手安家養贍之用。其應給之銀即於行月折色銀內扣給。所有存贍行月等項銀米山東河南江南浙江仍照舊按程分別追給。江廣二省程途遙遠其未經過江以前截留者除在次酌量給銀外其餘贍餘米一律照程途分別追給。如已過長江尚未渡河截留者應給予四分之三。至渡河以北至臨德等處截留者將各項銀米照抵通例全給。○八年題准湖南省撥廣東漕米每石折耗四合。○又題准湖南省

截撥廣西漕米。每石加耗米三合。於截漕減存  
里納二耗米內兌給。○又題准。江西省截留本  
省漕糧。每石加耗米三升。在贖軍斛面等米內  
支給。○九年題准。江西省截撥湖南漕糧。每石  
折耗米四合。江浙二省截撥福建漕糧。每石加  
耗米五合。○又題准。截留平糶所賣之錢。係漕  
項錢糧。或易銀解部。或搭放兵餉。將原給款項  
扣解。抵留漕費。○十四年覆准。各省漕船。遇有  
災緩。及在本地截留。將出運船隻。減存在水次  
者。其減存船數。由糧道造冊報部。○十八年

諭。凡截留省分。俱著該督撫專派大員稽查。不得委之州縣佐貳。以致滋弊。○二十二年奏准。漕米截留北倉及天津露囤各米。現在輪流派運。賞借旗丁剝價一半。俾得迅速回空。運通腳價。令旗丁自出一半。賞借一半。應交茶果箇兒銀錢及席片毛竹。均照例交納。至在津糧船。自岸起米至北倉。每扛米一石。給制錢六文。每船約需扛價四五千文不等。應於在津囤儲米石之幫丁出給。每百石照例加耗二石。准於來歲新漕內搭運補交。再經紀各役。代丁運送抵壩。既有每百石

加耗二石之數。再有短少。卽照掣欠例。責令經紀等賠補。於旗丁無涉。其扛米脚價。於通濟庫輕齎銀內暫行墊發。亦在各丁新漕內扣還。並移咨總漕。照例催追辦理。○又奏准。本年漕米暫儲北倉。軍船未經抵壩。例給運丁羨餘銀兩。酌給一半。○二十三年奏准。江興等衛截留天津餘贖米石。仍係運通。應追銀兩。免其扣追。○二十四年奏准。羨餘銀兩。定例給發。以濟回空之用。本年糧數。雖有截存。船仍到壩。照例全行給發。○又咨准。現截北倉米石。應交茶果銀兩。

暫緩交納。俟抵通後再行覈計米數。移咨總漕。飭令補解。○二十五年奏准。漕糧截留北倉轉運。每米百石。旗丁交船價銀六兩。地方官會同坐糧廳雇募剝船。飭令經紀等親身押運。又自河至倉。每石交上倉人夫扛價制錢六文。又每百石。旗丁出米二石。內以一石備補沿途折耗。五斗為經紀等飯食。五斗幫貼經紀等轉運雜費之用。每石給董夫銀五釐。一例支給。○四十二年奏准。江西省漕糧截留赴豫。其已歷長江。尚未渡黃截留者。行月銀米。給予四分之三。如

至臨清等處截留者。各項銀米。即行全給。○四十七年奏准。北倉截留漕米。其斛斗口袋。令天津縣自行備辦。並舊存木斛。與部頒收漕鐵斛。逐一較準。以便兌收。○四十九年定。截留米石。自北倉剝運抵通。每百石。旗丁向交地方官剝價銀六兩。惟江西六幫。殷疲不一。內有實不能全行交價者。即將通濟庫銀。每船各借銀三十兩。令該省糧道。於來歲扣辦歸款。○又奏准。北倉現儲漕米。內賞留二十二萬石。為直省買補倉糧之用。其凍阻之杭嚴頭四兩幫漕米。約七

萬餘石。於北運河一帶附近州縣內。查其應買倉糧者。就近撥交領運。明歲於北倉漕米內。照數扣抵。所需席片扛夫等項。均照成案辦理。○  
五十年

諭。曹州東昌濟甯臨清各府州屬。雨澤稀少。麥收歉薄。現在未得透雨地方。未經播種者。尚有三十州縣。將米恐有應需接濟之處。著於南糧頭進在後各幫內。截留二十萬石。存貯濟甯聊城水次。以備應用。○又奏准。截留漕米。如三進尾後數幫。入直稍遲。在沿河水次。覈計程途。分別截卸。移咨總漕倉場。

轉飭將截留米色並旗丁運官姓名開單咨送轉發。俟漕糧收清。飭令各州縣將收過幫船米數造送。○又奏准北倉截收漕糧。倉內鋪墊席片麻繩。例向旗丁取用。至氣筒等項。照例墊辦。事竣將墊製氣筒銀兩造冊請銷。在司庫存公銀內撥給還項。○又奏准安陵泊頭連鎮並滄州等處沿河水次截卸漕糧。照例先儘寺廟房屋。次賃民間屋宇。暫行收儲。統俟明歲春融。雇覓小船剝運赴通。○五十四年

諭向來北倉截留漕船米石。所有轉運通倉水腳銀兩。

俱係坐糧廳墊發。仍於該旗丁名下扣繳歸款。但思此項腳費。如係幫船行走遲延。不能依限赴通交兌。在北倉暫行留貯者。自應旗丁出資運送。若漕船本可如期抵通。因奉特旨截留北倉。以備撥用者。原與旗丁無涉。即當官為轉運。從前概令旗丁繳費運通。辦理未為允協。嗣後各省漕艘。有趨行未能迅速。抵通遲誤。恐致沿途阻凍。不能及早回空。在北倉截卸者。其運通腳費。自應照例扣繳。如係特旨截留。即着動支官項辦理。以示體恤。○五十七年議准。山東省協運豫漕各幫船。赴豫兌漕之時。順便帶裝截

留糧每站給行糧銀四錢五分四釐四毫每船  
緯夫四名每名每里給腳價一釐如係剝船專  
裝截漕米石赴豫交卸仍應放空回次者即照  
直省楊邨起剝之例每剝米百石加給食米一  
石二斗在截留各幫未用食米內支給。○嘉慶

六年

諭各省州縣設立常平倉存貯穀石定有額數原以備  
本處水旱偏災平糶賑濟之用若倉儲充實取之裕  
如何至民食艱於接濟總由各州縣平日不能實心  
經理或出糶後並未隨時買補還倉或竟任意侵挪

虧缺。以致積貯空虛。猝遇偏災。茫無所措。而該督撫等為目前補救之策。大率奏請截漕。殊不思京通各倉所貯漕米。以之頒給廩祿兵糧。無論歲收豐歉。俱應按數支放。即太倉之粟。陳陳相因。亦屬昇平盛事。焉有天庾正供。徒資外省截留之理。即如部庫帑銀。為每年經費所需。豈以供外省請撥。而各省應存庫項。不皆實貯。遇有緩急需用之處。動輒請發內帑。似此積習相沿。則外省所設倉庫。竟係有名無實。豈國家均平賦式之道乎。嗣後各督撫等。總當於各州縣倉庫根本要務。悉心講求。實力整頓。務使倉穀錢糧。

皆歸實貯。方為有備無患。毋徒以撥餉截漕為事。○  
又奏准。直隸省被水較廣。截留漕米六十萬石。  
分儲鄭家口。泊頭。天津北倉三處。所有天津截  
留之米。舊例截四存六。所存米石。尚須抵壩交  
卸。有需時日。此次儘在後之江廣船隻整幫截  
卸。俾空船及早南下。○又奏准。江廣七幫米石。  
在天津北倉截卸。交經紀接運。浙江尾後八幫。  
旗丁情願自用剝船。或雇民船剝運。俾大船及  
早回空。不必另行露囤。○又奏准。湖北。江西。兩  
省在後七幫。於楊邨全行起剝運壩。其飯米剝

價照例由旗丁全給經紀。每百石加幫貼銀二兩。米二石外。再加幫貼銀五錢。○又議准江西省鉛山等四幫。在北倉截剝。一切剝價飯米全數貼給經紀。照例先在通濟庫項下撥給。共銀二萬一千九百餘兩。應於該四幫船扣解。即將每船新漕調劑半耗。並向領腳耗。斛面等三項米石。以一兩九錢折變。共得銀八千一百餘兩。又江西本年截留鄭家口泊頭兩處幫船。奏加米石。令州縣一體扣存折變解道。以抵庫款。可得銀六千餘兩。計兩項共得銀一萬四千一百

餘兩不敷銀七千八百餘兩。在鉛山等四幫冬運錢糧內扣銀三千兩。其餘銀兩令江西於道庫間款內暫行湊還。仍於該四幫來年米折項下全數歸款。○十一年奏准湖南省幫船行抵漢鎮截留陝西原船回次二耗米石照程途扣算數給。又每船防護舵水四名。每名自給米一升。又每幫看減千總一員。年給養廉米九十五石。以三百六十日數派。自歸次之日起。至年底止。按日數給。又守減船減半月糧內一半本色米石。均在二耗米內扣給。其一半折色月糧銀

兩。在追還行月京腳銀內動給。又每出運船內。它出找截陝省米一百五十餘石。支過京腳銀兩。免其扣追。又截留船隻。准算一運。又軍幫運義津貼等項銀兩。照乾隆六十年蠲漕減歇全給之例一體支給。○十二年奏准本年河口淺阻。以七月二十日為限。在後未渡黃之江西湖南並宿州二。共十三幫船六百六十八隻。計米七十二萬餘石。一律於淮揚截卸。分撥江蘇二十萬石。安徽十萬石。委道府督飭起卸平糶。其平糶價值。解司報撥。仍令江西湖南各巡撫動

用司庫銀兩。按照市價採買足數。交幫搭運。其  
回空各幫。因重運節節起剝。諸形竭蹶。以歸次  
之遠近。定給借米之多寡。江浙每船借給米二  
十石。江廣每船借給米三十石。通共約借給米  
十萬石零。以作回空口食之需。仍於新運責成  
原借之丁。購買運通。至截留米內。除平糶及借  
給各幫米石。不必貼出耗米。仍扣留以備下年  
搭運之費外。所有截存米石。令旗丁每百石貼  
出米二石。來年搭運時。准其開銷。如再有虧折。  
令該管備弁總運等。分別貼出。儻有偷竊等事。

致有短少。惟防範之地方文武是問。○十四年  
奏准北倉截留米石。牆外堆撥。責成天津鎮派  
委弁兵晝夜防守。該鎮仍不時親身往來照料。  
楊邨寄撥事宜。向止通判一員經理。未能裕如。  
應令天津道暫駐楊邨督率辦理。○十五年咨  
准漕糧截撥陝省轉運米石。援照乾隆十六十  
八年碾運浙江米石之例。每石給經費米五合。  
每船支給安家米二十石。免其追繳。應追程途  
行月京腳銀兩。分作三年。在各丁新運錢糧內  
照數扣繳。其四耗米內一五給丁米石。在交倉

耗米扣給。又領運千總。准於漕費銀內。按正米  
每石支給銀五釐。以為盤費之用。又隨幫千總  
給廩工銀五十四兩。養廉銀二十四兩。又守減  
每船回籍水手六名。每名每站給銀三分。米一  
升。每石折銀八錢。○又奏准。截却北倉米四十  
萬石。倉場侍郎等酌分一人前往督辦。俟次年  
冰泮。仍令豫東二省軍船裝運。○又奏准。石壩  
暫囤米三十萬石。楊邨寄撥米三十萬石。俟軍  
船埽數回空。自九月霜降日起。至十月二十五  
日小雪以前。全數起運進京。○十六年奏准。轉

運北倉米石。每百石向給剝船雇價。飯米折色銀七兩九分有零。嗣後將應給經紀名下每百石津貼銀二兩五錢。及責令截留運丁。每石分給食米一升。給予東豫幫丁。二項一併劃出。轉給剝船船戶。俾資運費。仍飭文武員弁多帶兵役。沿途管押。儻有偷漏等弊。嚴拏懲辦。○十九年奏准。北倉截却湖北。江西等幫米四十四萬九千九百餘石。來年運通。令豫東三省軍船。於正漕完竣後。各添剝船。將前項截却米石。再運一次。所需船價飯米折色津貼等項銀兩。於通

濟庫墊發。在截留幫丁新運錢糧內歸款。其楊  
邨寄發之浙江江西等幫各船一經騰空。即行  
催趨南下。○道光五年奏准北倉截卸杭嚴頭  
等十八幫計旗丁七百九十八名。每名借給銀  
二十兩。共需一萬五千九百六十兩。在天津海  
稅項下暫行動撥給發。咨照漕督。在各省新漕  
項下分作兩年扣還。並飭各糧道先行籌項解  
天津道庫歸款。

漕糧徵收。○順治九年題准各省漕糧向係軍  
民交兌。軍強民弱。每多勒索。嗣後定為官收官

兌酌定贈貼銀米。隨漕徵收。官為支給。民間交完糧米。即截給印串歸農。軍民兩不相見。一應浮費。概行革除。○雍正二年

諭。地丁漕米徵收之時。劣生劣監。遲延控欠。不即輸納。大干法紀。該督撫立即嚴查。曉諭糧戶。除去儒戶官戶名目。如再有抗頑不肖生監。即行重處。毋得姑徇。儻有瞻顧不力。革此弊者。題參治罪。○四年議准。蘇松二府所收倉糧交兌之外。果有贏餘。該州縣報明存儲公所。以為修理倉廩及賑濟之用。儻有藉贏餘名色。加收斛面。及該道扶同徇隱。查

出。從重治罪。○六年

諭江浙徵收漕米。但擇乾潔。不必較論米色。准令赤白兼收。私杭並納。永著為例。○八年題准。州縣徵收糧米。豫將各里各甲花戶額數的名。填定連三版串。一給納戶執照。一發經承銷冊。一存州縣校對。按戶徵收。對冊完納。即行截給歸農。其未經截給者。印官摘戶追比。若遇有糧無票。有票無糧。即係吏胥侵蝕。監禁嚴追。○十年咨准。江南省句容縣。地處山陬。多產私稻。歲額漕糧四萬有奇。向來徵兌。悉係糶私易杭。於民未便。嗣後

即將土產私米完漕輸納。毋庸糶私易稅。○乾隆元年題准。農民完納漕米到倉。州縣驗明米色。隨到隨收。嚴禁蠹書留難等弊。違者叅處。○二年題准。州縣漕糧原額田地。向有荒缺。凡遇報墾升科。於漕糧正耗內加入升科兌運。如無荒缺。漕糧足額。遇有升科漕米。皆解司充餉。儻有誤將足漕州縣升科漕米。應行解司之項。造入漕項奏銷者。題明改正。○三年題准。河南省漕糧。向止合邑總額。並無每畝應徵定數。今酌定祥符等州縣。各照現額漕米數目。按實在行。

糧熟地。除原不徵漕之更名等地外。無論倉口  
新升。一例均派。數明某則地。每畝徵米若干。徵  
銀若干。遇閏加增銀米若干。載在全書。遇有升  
除。按則增減。其改徵黑豆。全書內統以米數開  
造。○四年

諭。湖北每年額徵漕米。運通倉者。名曰北漕。給荊州官  
兵者。名曰南漕。二項合收分解。永遠遵行。如有分項  
徵收零星多取者。該督撫嚴叅治罪。儻別省收漕地  
方有分收者。該督撫酌量查禁。○五年。覆准。各省漕  
耗等項。久經酌定成規。而不肖有司。竟有立名

需索苦累民間者。應令督撫力為釐剔。道府密  
行訪查。州縣有不按定例需索加派。私行改折。  
及縱容胥吏舞弊侵蝕道府。即行揭參治罪。儻  
有徇隱。督撫查出。將道府一併題參究處。又  
題准江南省蘇松糧道所屬漕糧。按照區圖。派  
廠收納。河南江西浙江湖南。不分區圖。隨廠收  
納。江南江安糧道所屬。及山東湖北。糧多之處。  
按照區圖。糧少之處。不分區圖。收納。毋致糧戶  
擁擠守候。又咨准江南省海州漕米。民折官  
辦。為數無多。令該州購買白色乾潔好米交兌。

不准紅白兼收。○六年

諭江南下江地方。秋雨連綿。米色稍減。從前原有赤白兼收之例。該地方官酌量可收。即日收兌。抵通之後。或慮不能久貯。即發為俸餉之用。○七年議准。直省有漕各屬。於隔歲年終刊刻易知由單。將該戶田地若干。應完地丁漕截若干。漕白米若干。其地丁加耗若干。白糧加耗若干。漕截加耗若干。如何均攤勻扣。於單內逐一註明。分給各該戶。照單完納。如有多科情弊。督撫嚴參治罪。○八年題准。各省收兌漕糧斛式。向來底面尺寸相

等因口大邊闊。易於浮溢。應改鑄小口鐵斛。頒發倉場。並有漕各省一例遵用。其從前原頒大口鐵斛繳銷。○又題准徵收漕糧。令督撫嚴飭州縣於開倉時。親詣稽查。若因公他出。暫委佐貳官監收。其州縣在倉看守之親戚人等。以及經手吏役。如有包攬浮收。交通舞弊者。即行揭報。嚴叅究處。監收佐貳官扶同隱匿。一併究叅。

○十年

諭聞江南下江漕糧緊兌之時。印官不能處處親驗。吏胥等遂多方刁難。小民不能等候。情願議扣。自九五

折至九折不等。向來徵收漕糧弊實甚多。江蘇之漕。甲於諸省。尤為積弊之藪。著有漕地方大小官員。嚴行釐剔。如有仍蹈故轍者。經朕聞知。或被御史叅劾。必重加處分。○十三年題准。豫省粟米向例黃白兼收。其額徵之麥。無論黃白淺深。籽粒大小。均許兼收。○二十四年

諭。上年江蘇浙江偶有偏災州縣。曾經降旨。俱令紅白兼收。但該二省比年以來。屢獲豐收。間有收成稍歉之處。不過一隅偏災。該督撫等遂照例陳請一律兼收。並納倉儲關繫重大。逾格邀恩。視同常事。將來勢

必無所底止。嗣後漕糧米色務須一律乾圓潔淨。不得濫行陳請援例收兌。以致久貯折耗。方為慎重倉儲之道。○又奏准收兌漕糧例。應乾圓潔淨。如實在水旱歉收。米色不能圓潔者。照例豫行題明辦理。不得濫行收兌。○五十二年議准各省漕糧督飭各州縣徵收乾圓潔淨之米。交兌運通。儻遇雨水失調之年。亦必曬晾乾潔。取具監兌各官印加各結送部。至兌運上船以後。司漕各官責令旗丁查看。隨時風晾。以免潮溼。○嘉慶十八年奏准州縣徵收漕糧。務須慎選好米。按額

收足。儻有私收折色者。一經查出。或控告得實。即行照例嚴參。如刁生劣監收攬包交。甚或開漕滋事。及領運弁丁索取兌費。並違例折乾等事。由各上司及專管糧道嚴查重究。又定各省州縣收納漕糧。糧戶到倉。隨時驗明米色。即令自行交納。儻有淋尖踢斛。或剗去斛裏。改換斛面。或額外收取樣米。或斛面餘下之米。作為席墊。不准業戶取回。或借米色為辭。私自增加。或蠹役刁蹬留難。包攬代完。侵蝕飛派等弊。州縣隨時查拏。嚴行懲辦。如有徇隱。糧道嚴參究

治糧道徇隱。督撫查參。督撫徇隱。一併議處。儻該管上司收受陋規。照枉法贓科罪。○道光四年

諭。各省漕務積弊相沿。土豪蠹役壟斷把持。遂有以完作欠之弊。又收漕時委員以查漕為名。實為調劑候補人員起見。不過勒索陋規。均不可不嚴行飭禁。著各省督撫嚴飭所屬州縣。每季徵收完解時。將實欠花戶姓名。送該管道府用印。仍發回本地張貼。如有以完作欠者。許該花戶指控究辦。其各省查漕委員。概行停止。○又奏准。州縣徵收漕米。截數之後。將欠

戶姓名徧貼曉諭。如有包戶蠹役。以完作允。許該花戶指控嚴究。其收漕在鄉倉者。先行示期。計日按鄉分收。在城倉者。將開倉日期。及早示諭。收米時。每日將遠鄉窮民零星未石。先行量收。次及近倉各戶。不得刁難勒捐。致花戶守候。其有包攬匪徒。恃強把持者。仍隨時嚴拏究辦。○又奏准浙江省未苗。因風受傷。米粒未能飽綻。所有向徵粳米之海甯等州。准其紅白兼收。私種並納。仍飭各州縣加意揀選。不得藉詞濫收。○二十六年

諭。近年漕糧運京。多有短少。本年尤甚。較之全漕。短至一百萬石。蘇松江安兩糧道。起運尤屬不敷。現屆開徵兌漕之時。著通諭有漕省分各督撫。自今年為始。漕糧一經徵齊。即將該省額徵若干。本年起運若干。緩缺若干。逐一比較。上三屆數目。據實奏明。迅即造具清冊報部。俾得豫先覈計。不得沿向來舊習。於開兌以後。始行咨報。儻比較有減無增。即由該省設法。立將短數補足起運。方不致有誤支放。並著漕運總督一體遵照。悉心籌畫。實力稽查。總期前除積習。按額收倉。庶漕政可肅。而積貯常充矣。○光緒十一年

奏准江西省漕糧完納過遲積欠日甚嗣後應  
改為年內按限加徵以期完解迅速自開徵之  
日起初限一月內不加第二月為二限每石加  
錢三百文過此均為三限每石加錢五百文所  
加錢文解道府存儲充修理隄工之用

欽定大清會典事例卷二百

戶部

漕運 白糧徵收 漕糧調緩

白糧徵收○順治初年定白糧米色責令糧道  
監兌等官公同親驗如有米色不純等弊指叅  
治罪各該州縣交兌時即將白糧樣米封儲運  
通以憑查驗○十二年題准州縣官交兌白糧  
照漕糧之例冬兌冬開該督撫於開幫之日註  
明交兌月日列疏題報如有遲誤按例議處○

乾隆二年

諭聞得江浙兩省民間輸納白糧較漕糧費用繁重甚屬艱難朕心深為軫念諭令該部詳考據奏兩省歲運白糧二十二萬餘石太常寺光祿寺各賓館需用二千餘石王公官員俸米約需十五六萬石內務府禁城兵丁及內監食用等項需萬石尚餘五萬石存倉等語朕思光祿寺等處所支原以供祭祀及賓館之用在所必需其王公官員俸米應用白糧者可酌量減半以杭米抵給至賞給禁城兵丁及內監食米亦可將白糧裁減給以杭米如此則每年所需白糧不過十萬石仍照常徵收起運其餘十二萬石著漕

運總督會同該督撫酌行改徵漕糧。其經費銀米均照漕例徵收。以紓民力。○又題准江浙二省運京白糯米每歲應需九千石。均攤科算。浙江原辦運白糯米正米五千二百四石。照例採買辦運。江蘇常州府原辦運白糯米正米九百八十石。九斗六升二合。今派九百七十七石。蘇州府白糯米原辦運四千二百六十八石二斗八升四合零。今派二千八百十九石。以足九千石之數。餘均改徵漕糧。至松江府太倉州屬偏處海濱。採買艱難。將白糯米全改漕糧。○五年題准江南省崑山

新陽二縣荒瘠田蕩應徵白糧六百二十一石有奇。於各縣南米內通融辦運。○七年題准浙省杭嘉二府有應徵白糯米。浙地素不產糯。應隨漕統徵杭米。官為易糯舂辦兌運。○四十年奏准江蘇省編徵白糧。歲有定額。凡遇災年例不蠲緩。今蘇松常太四府州屬收成歉薄。將額辦白糧於熟田應徵漕米內通融辦運。俟來年補徵仍作漕糧起解。○又奏准江浙二省運京糯米。覈計歲需尚有多餘。自乾隆四十一年起該二省應運糯米酌減一千石。○道光三年

奏准。江蘇省被災應徵白糧。次年帶徵搭運。因米數較多。船有定額。勢難一運並裝。將緩徵白糧米共四萬六千二百五十四石。勻分兩年搭運。各就各屬水次。按船灘帶分裝。此內有分三限催徵者。其末限應徵之米。先於徵收初二限緩漕款內撥解足額。屆期徵還。即作為緩漕起運。仍將應運應徵米數。分別造報。應給各款銀米。即照加裝米石。按數數給。○同治五年奏准。浙江省嘉湖二府。應徵白糧。被兵之後。新墾田地。土性堅瘠。米質柔嫩。春白難於合式。按照成

熟分數徵運以紓民力。

漕糧蠲緩○順治初年定漕糧原有定額凡荒地無徵者該督撫勘實具題准予豁免仍責令各州縣招墾毋致久荒○又定災傷地方應徵漕糧及改折漕價當年不能完納者酌量被災輕重或全行緩徵或緩一半或分作兩年三年帶徵○又定凡田地沿江沿海坍沒水中無從徵漕者保題豁免○康熙七年題准凡漕糧已經寬期帶徵遇帶徵之年復被災傷其上年帶徵之糧分年壓徵帶補○九年題准漕糧寬期

帶徵漕項銀原無帶徵之例如有被災過重州縣該督撫題請寬緩者分年帶徵○十年題准荒缺田地題豁漕糧隨漕銀米一例蠲免○二十一年題准築隄占用民田應徵漕糧概予豁除○三十年

諭京通各倉累年積貯之糧恰足供用應將起運漕糧逐省蠲免以紓民力除河南明歲漕糧已頒諭免徵外湖廣江西浙江江蘇安徽山東應輸漕糧著自康熙三十一年為始以次各蠲免一年○雍正八年

諭前因河南亦有被水州縣特降諭旨令該督按照款

收分數。蠲免漕糧。今據該督奏稱。豫省州縣收成雖有不等。實未成災。且士民踴躍輸將。今歲漕糧現在完交兌運等語。士民等急公奉上。甚屬可嘉。但被水州縣雖未成災。而收成分數既有不等。著該督仍將歉收分數。照例蠲免。即將已兌漕糧。准作雍正九年正供。以示朕加惠豫民至意。○十年題准。凡水淹田畝。例於每年冬底確勘一次。涸則起徵。淹則停免。嗣後淹田漕米。先於糧冊刪除。照歷徵之例。俟冬勘後。涸則次年帶徵。淹則題請豁免。○十

三年

諭雍正十二年以前民欠未完漕項銀全行豁免嗣後  
遇有恩詔均入於豁免內永著為令○乾隆二年題  
准漕糧係屬正供難容缺額即漕項銀亦辦漕  
之需其間遇有蠲免出自

特恩原非定例僅有被災地方令有漕督撫確勘實  
在情形或應分年帶徵或按分數蠲免均臨時  
具題請

旨遵行○六年咨准各省凡遇災傷多將漕項彙入  
地下並請蠲緩以致牽混嗣後無論咨題案件  
有關漕項者專案造報○三十一年

諭朕統御萬方。孜孜求治。惟以愛育黎元為念。自御極以來。蠲賜所逮。不下千億萬。惟歲運漕米。向以供給俸餉廩糈之用。非水旱特蠲。例不普免。夫八政以食為先。閭閻蓋藏。尤資饒裕。且連歲年穀順成。庶物豐殖。京通倉儲。儘有餘粟。所有湖廣江西浙江蘇安徽河南山東應輸漕米。於乾隆三十一年為始。按年分省通行蠲免一次。○又

諭前經降旨。將各省漕糧。分年普免一次。但聞漕糧款內。尚有例徵折色。及民戶輸銀官為辦漕者。雖徵收銀米不同。其為按田起漕之例。則一。若令其照漕項

一例輸將不得與交納本色民戶。並邀曠典。未免向隅。著再諭辦漕各省州縣。內有徵收折色者。一體概予蠲免。○四十三年

諭各省漕糧。於乾隆三十一年普免一次。茲蒙

昊蒼眷佑。累洽重熙。朕體

天心。愛養億兆。用是再沛恩膏。著於庚子年為始。復行普免天下漕糧一次。俾臧富於民。共享盈寧之福。其如何分年輪免之處。著戶部議奏。欽此。遵

旨議定。乾隆四十五年。免河南省。並江蘇之江甯。蘇州。揚州。徐州。淮安五府屬。四十六年。免山東省。並

江蘇之松江常州鎮江太倉海州通州六府州  
屬。四十七年。免浙江省之杭州湖州二府屬。四  
十八年。免浙江省之嘉興府屬。四十九年。免安  
徽省。五十年。免湖南省。並江西省之南昌饒州  
南康廣信四府屬。五十一年。免湖北省。並江西  
省之瑞州臨江吉安撫州建昌贛州六府屬。其  
各省隨漕等項銀米。仍舊徵收。以供停運丁船  
減半月糧之用。至各省情形不同。一切條規。均  
令按照三十一年辦理。○五十九年

諭朕臨馭天下五十九年。仰蒙

昊蒼眷佑

列聖貽庥。薄海昇平。梯航向化。重熙累洽。惟日孜孜。無時不以敬。

天勤民為念。行慶施惠。錫祜延禧。普免漕糧二次。地丁錢糧四次。而偶遇水旱偏禔。隨時蠲租。賜復賑貸。兼施所以涵養生息。子惠黎元。至周且渥。茲紹膺統緒。明歲正屆六十年。粵稽史冊。前代帝王享國長久者。未可多得。朕春秋二十有五。誕膺大寶。迄今八旬。開四五代同堂享國之年。幸周甲子。實為古今罕觀之盛事。皆蒙

昊貺駢蕃。克膺備福。感荷之餘。彌深兢業。理宜覃敷恩澤。加惠閭閻。俾海宇子民。共臻樂利。所有六十年各省應徵漕糧。著再加恩普免一次。○嘉慶二年

諭。前因楚省軍務倥傯。賊匪滋擾。所有上年應徵漕糧。業經降旨加恩。緩至本年開徵。第念本年現有應徵額漕。若將此項緩漕一併完納。民力恐未免拮据。所有湖北各州縣應徵上年漕糧。著再加恩。照向年緩漕成例。分年帶徵。其隨漕一切應徵銀米。亦著查照向例一體帶徵。漕運。○又

諭。湖北省本年應徵漕米。南米並帶徵上年漕米。及本

年隨漕水腳等項銀糧一併緩俟大功告成再行酌量分年帶徵以紓民力○四年

諭現屆長至

園丘大祀

高宗純皇帝

升配禮成後自應仰推

皇考恩慈用敷惠閭因思乾隆六十年以前各省積欠緩徵地丁耗羨及民欠籽種口糧漕糧銀兩並積欠緩徵民借米穀草束等項現在應徵者尚復不少著該部通行各省詳細查明將以上各款自乾隆六十

年以前普行豁免。○道光三年奉

旨。山東頻年災歉。民力拮据。著加恩將該省嘉慶二十三年至道光二年未完緩徵民欠錢漕等項均停緩二年。以示朕格外施仁至意。○二十六年奏准漕糧關繫兵精民食。非災傷過重不准率請蠲緩。嗣後如有因災過重。奏請蠲緩漕糧者。該督撫查照舊例確覈情形。於地丁摺外另行具摺。不得與地丁籠統奏報。並將州縣區圖村莊名目分晰開單候

旨遵辦。如缺額較多。仍令該督撫設法補足起運。○

同治二年

諭前因浙江省金嚴甯紹台等府地方均為賊踞百姓慘遭荼毒。曾經降旨將浙東新復各府州縣均蠲免二年錢漕。以蘇民困。嗣因衢州一城雖未失陷。而西安縣各鄉亦俱被匪焚掠。復降旨將該縣錢漕照新復州縣一體蠲免。茲據左宗棠奏稱。同治元年分錢糧業於咸豐十一年冬間奉旨豁免。所有前奉恩旨請飭遵行等語。浙江被陷地方。同治元年分錢漕既已有旨豁免。即著將同治二年分應徵錢漕一體豁免。並著於原降諭旨二年上。添註同治二字。以示區

別而免牽混。該撫其迅即頒發騰黃。徧行曉諭。又諭蘇松太三屬地方。為東南財賦之區。繁庶甲於天下。而賦額亦為天下最重。比諸他省。有多至一二十倍者。良由沿襲前代官田租額。且自宋明兩代。籍沒諸田。皆據租籍收糧所致。嘉靖中。又令各州縣盡括境內官田民田。分攤定額。蘇松等屬田賦。至比官田通額。亦皆大有增加。我朝順治年間。即經明奉

聖諭。以故明仇怨地方。加糧甚重。我朝何可踵行。飭由地方詳查具奏。嗣於雍正乾隆年間。疊奉

恩旨。以蘇松浮糧。施恩議減。將蘇州府額徵銀。蠲免銀

三十萬兩。松江府十五萬兩。又江省糧額浮多之處。加恩免徵銀二十萬兩。仰見我

祖宗軫念民艱至深且厚。國家承平百餘年來。海內殷富。江蘇自乾隆年間。辦理全漕者數十年。固由民力之充。亦屬民心之厚。暨道光年間。兩次大水以後。各州縣每歲荒歉。加恩蠲減。遂成年例。嗣是每年徵收之數。內除官墊民欠。率得正額之七八成。或四五六成不等。民力殆已難堪。及至粵逆竄陷該省。焚燒殺掠。民盡倒懸。幸自上年官軍克復松江。本年克復太湖。現方飭令統兵大臣等。進取蘇州。救吾民於水火。

而各地方經賊荼毒彫瘵至極若不將各該府州屬數百年來浮糧積弊仰體

列聖深仁厚澤大為覈減無論民力斷有不堪即使勉強減成輸納何以慰如傷之隱而施浩蕩之仁且令官紳胥吏徒營中飽尤為弊之甚者亟宜因此時會痛加埽除所有蘇州松江太倉三府州屬糧額著兩江總督江蘇巡撫督飭司道設局分別查明各州縣情形折衷議減總期與舊額本輕毋庸議減之常州鎮江二府通融覈計著為定額先自松太創行即以

此後開徵之年為始永遠遵行不准再有墊完民欠

名目。蘇州所屬。俟肅清後。一體辦理。嗣後非大水旱成災。實在荒歉者。並不准捏災請緩。請蠲。至蘇松漕弊。尤莫如大小戶等名目。紳戶把持。州縣浮收。種種弊竇。皆出其中。著即永遠禁革。所有一切辦理章程。及應行裁革之浮收陋規。包戶等積弊。均著該督撫悉心妥籌。詳細具奏。○三年

諭。浙東各屬錢糧。以紹興徵數為最多。而浮收之弊亦最甚。經左宗棠查明覈減。除正耗仍照常徵解外。共減去錢二十二萬有奇。米三百六十餘石。民困諒可稍蘇。即著照所議辦理。嗣後並著為定章。永遠遵行。

○四年

諭戶部奏遵議江蘇減免漕糧章程數目一摺。江蘇蘇松常鎮太五屬編徵米二百二萬餘石。原係彙同漕贈行月南恤局糧等款。一串徵收。自應如李鴻章等所奏。無分起運留支。一體並減。至以科則之重輕。地土之饒瘠。為減成之多寡。辦理亦尚妥協。加恩著照所請。所有蘇州府屬額編米豆八十七萬七千五百六十四石零。著減三十二萬六千六百三十二石零。松江府屬額編米四十二萬七千四百六十一石零。著減十一萬六千五百四十四石零。太倉州屬額編

米豆十五萬三千四百三十二石零著減四萬二千八百七十七石零常州府屬額編米三十五萬五千九百八十石零著減三萬五千五百九十八石零鎮江府屬額編米二十一萬四千七百三十五石零著減二萬一千四百七十三石零統計原額編徵米豆二百二萬九千一百七十四石零共減米豆五十四萬三千一百二十六石零仍應徵米豆一百四十八萬六千四十八石零著自本年為始照減定數目徵收其各屬派減米豆數內尚有留為沿海瘠區加減之數並著照章分別覈派應減科則另行造報經此

次派減後。該督撫等務當督飭所屬認真徵解。不准再有官墊民欠名目。非實在旱潦為災。不准請蠲。請緩。如有捏報災歉蒙混呈報者。即著嚴叅懲辦。其把持浮收等弊。並著永遠革除。以裕民生。而重賦課。○

又

諭。曾國藩等奏請將蘇松等屬地漕錢糧一體酌減。當經諭令戶部妥議具奏。茲據奏稱。漕項一款。額徵正銀六十餘萬兩。實為辦運要需。歷屆海運成案。除動支漕贈等銀外。尚須另提津貼。若將漕項隨同正漕數減。必致運費不敷。多提津貼湊用。是減一分漕項。

即增一分津貼。於民生仍無裨益。至地丁一款。額徵正銀一百四十餘萬兩。該省每歲支銷各項。及一切水旱賑恤等款。咸取給於此。今若減去二成。僅歲存一百十餘萬兩。以蘇藩之財。供蘇省之用。猶虞不給。而部庫提項。鄰封協濟。又難保其必無。轉輸無術。必致另設名目。重困閭閻。與其迫民間以額外之追呼。何如還民間以分內之輸納等語。所奏係屬實在情形。蘇松田賦最重。我朝酌中定則。並兩次豁除浮糧六十五萬兩。上年蘇省底定。復永減漕額數十萬石。所以軫恤黎元者。無微不至。今曾國藩等所請地丁

漕項併減二成之處。如果損上益下。有裨民生。亦何  
忍屯此膏澤。第國家制用有常。總當通籌全局。量入  
為出。方可行諸遠久。况恤民之政。不在減定額。而在  
截浮收。上年左宗棠奏。杭紹嘉湖四屬地漕銀一百  
八十二萬餘兩。覈減浮收銀五十七萬餘兩之多。可  
見該地方官。平日違例取盈。重為民困。曾國藩李鴻  
章等。惟當於蘇省地漕等款。仿照浙省辦法。斟酌情  
形。敦實刪減浮收。庶民力可望日紓。而正供不致虧  
缺。其如何酌量刪減之處。即著該督撫等。迅速籌辦。  
妥議具奏。再聞蘇省徵收銀米。向有大小戶名目。輕

重不均。最為漕糧積弊。推原其故。總緣州縣官違例。浮收。地方紳衿得以挾持短長。包完短交。流弊百出。而馴良之戶。則官吏任意抑勒。以為挹彼注茲之計。事之不均。莫此為甚。並著該督撫等督飭州縣各官。潔己奉公。不准絲毫妄取。儻仍有大戶包攬短交等弊。著該地方官執法嚴辦。毋稍姑容。○又

諭馬新貽奏數減漕南浮收。禁革陋規。以肅漕政一摺。浙省正漕。前經降旨分成數減。並准部議。以漕項籌抵運費。皆所以軫恤民艱。茲據馬新貽奏稱。請將額外浮收。痛加裁汰。覈實酌留。耗餘辦公。以蘇民困。計

杭州府屬共可減浮收米六萬四千六百餘石。嘉興府屬共可減浮收米二十八萬五千三百餘石。湖州府屬共可減浮收米十三萬六千八百餘石。杭嘉湖三府南米共可減浮收折色錢二十四萬七千餘串。從前一切陋規概行裁汰各等語。即著照所請將留裁各款印造冊存案。並著該撫等明白曉示。勒石永禁。漕糧概完本色。其有情願完折者。按照市價收納。悉聽民便。至杭屬之新城於潛昌化等縣。漕糧向收折色。官為辦運。仍著照舊辦理。按照市價徵收。儻有不肖州縣仍敢蹈從前勒折浮收陋習。即著該督撫

嚴叅治罪。至所稱浙省大戶完漕。並不加耗。甚至把持包攬等弊。經此次改定新章之後。紳民一律徵收。不准有大小戶名目。再分軒輊。僅有紳士等恃勢把持。仍前包攬短交。著一併從嚴叅辦。○又

諭。劉卹膏奏蘇松等處減賦數目。間有參差。據實更正。檢舉一摺。據稱江蘇蘇松太等處。共應遞減米四十七萬七百餘石。惟松屬低薄。加料田蕩。有一畝四五分。或二三畝。始准熟田一畝者。前奏照原田頃畝。作為中則派減。覈與賦役全書不符。且與前奏蘇松太章程二條所開前項田蕩。仍照折實熟田料則一體。

數減之處亦未臆合現已一律更正該署藩司於前  
開總數內未經查明實屬疏忽請與該護撫一併交  
部察議等語○暫護江蘇巡撫劉邨膏署江蘇布政使  
郭柏蔭均著交部察議○所有咨送部科減賦清冊著  
該部查覈辦理○又奏准浙江省杭嘉湖三屬漕糧  
酌量覈減按原額三十分中減去八分除南糧  
並白糧春耗兩款毋庸議減外杭州府屬九州  
縣額徵米十七萬八千一百十九石零減米二  
萬五千七百三十五石零嘉興府屬七縣額徵  
米五十八萬七千四百七十五石零減米十四

萬五千四百十六石零。湖州府屬除孝豐一縣向不料米。應免覈減外。其餘六縣額徵米三十八萬十四石零。減米九萬五千六百十三石零。統計杭嘉湖三屬共減米二十六萬六千七百六十五石零。○五年

諭前據李鴻章等奏。查明蘇松等屬裁撤浮收實數。禁止大小戶名目。當經降旨令該督等勒石遵行。茲復據李鴻章等將減定徵漕餘耗折價各數查明具奏。開單呈覽。計蘇州府屬一廳九縣。減定賦額。應徵米五十五萬九百餘石。共減去浮收米十九萬二千八

百餘石。減去浮收錢七十五萬三千五百餘串。松江府屬一廳七縣。減定賦額。應徵米三十一萬九百餘石。共減去浮收米十萬八千八百餘石。減去浮收錢五十萬五千七百餘串。常州府屬八縣。減定賦額。應徵米三十二萬三百餘石。共減去浮收米七萬三千石。零。減去浮收錢二十一萬五千二百餘串。太倉州並所屬三縣。減定賦額。應徵米十一萬五百餘石。太倉鎮洋二州縣。共減去折價浮收錢九萬四千串。零。嘉定寶山二縣。共減去折價浮收錢十萬七千六百餘串。以上蘇松常太四府州屬。共減去浮收米三十

七萬四千六百餘石。減去浮收錢一百六十七萬六千二百餘串。又蘇松常鎮太四府一州所屬各廳縣共額徵銀二百十五萬兩零。折收錢文。除鎮江府屬未定外。蘇松常太四府州屬共減去浮收錢四十餘萬串。該署督等即將減去浮收實數。欽遵勒石。永遠奉行。至鎮江府屬四縣。減定賦額。應徵米十九萬三千二百餘石。共減去浮收數目若干。著該署督等於啟徵時。另行酌覈。奏明辦理。○十二年議准。江蘇省丹徒縣沙潮田地六萬五千五百三十三畝零。昔腴今瘠。一律照該屬蘆岸地科則徵收。覈計。

實減米四千四百六十餘石。仍令該省查照向來漕南奏銷各歸各案辦理。務使漕南分算仍與三分減一十分減一之數各相符合。○光緒三年

諭江甯府屬上元江甯句容六合江浦五縣應徵漕糧等均著減免十分之三。以紓民力。○又議准江蘇省高淳縣各鄉田地攤帶虛糧一律豁免。照原則六升六合起科。以蘇民困。○六年

諭江蘇溧水縣地方開墾荒田無多。瘡痍未復。若將坍沈賦課仍令照常攤賠。民力未免拮据。所有溧

水縣攤入實存田地賠完虛糧七百三十一頃零。即行豁免以紓民力。○又議准江蘇省嘉定寶山二縣因漕折併入。每畝最上科則須徵銀一錢四分。嗣後該二縣漕折銀數仍歸本色。數入現徵米內併算科則。如在五升以上。仿照常鎮二屬成案。裁減十分之一。○七年議准江蘇省金壇縣科則較重。於前次普減一成外。將該縣五升三合零及四升四合零各則照額各減十分之一分四釐。以蘇民困。